

Liaigh gach gona grás Muire

[Carney, James: *Poems on the O'Reillys*, Dublin, 1950, poem 21]

Aodh Mac an Bhaird mac Diarmada

1 Liaigh gach gona grás Muire,
liaigh rén cosmhail [cládh] neimhe,
luibh chobhra ar chiaigh don uile,
Muire ar liaigh cobhra cneidhe.

2 Liaigh fíre an liaigh dá leantair,
ar ndín-ne ón liaigh ní lothair;
liaigh do fhóir inn ór ndeacruibh,
cóir leantair don fhinn fholtghloin.

3 As sí an liaigh-si dá labhruim,
liaigh as díse ar gach ndoghruing,
ainm don liaigh muir ós minlín,
liaigh inghill 'gá bhfuil foghlúim.

4 Mac Aodha ar n-uaitne feadhma,
ar ccaor bhuidhe as beag labhra,
luibh grás dá ghuin go bhfoghbha
fuil Chonnla a ccás na cabhra.

5 Grás Muire dhúinn as deighliaigh
re ndula 'san dún tirmshídh,
fan nguín-sin an óig armruaidh,
Balbhuidh Fhóid Uisnigh fhinnmhín.

6 Sirim ar naomhaibh nimhe
[as itghe do thaobh thola]
ar mo dhán, ní duais eile,
cládh neimhe ó ghuais na gona.

7 Nír thuill Filib fuair umhla
[d'fhillidh as uair dá labhra]
guil 's gach taoibh uaidh gidh iomdha
diomdha naoimh dár bhuail Banbha.